

TEZĂUR LITURGIC

1 NOIEMBRIE

SLUJBA

SF. PREOȚI-MUCENICI

ALEXANDRU


SMIRNOV

ȘI

TEODOR REMIZOV

DE LA

VÂȘEGOROD



MOSCOVA, 2000

Служба

Свщмчч. Александру Смирнову и Феодору Ремизову, иерею, Вышегородскому НА ВЕЛИЦЕЙ ВЕЧЕРНИ

На Господи, возвах: стихирьы, глас 5

Подобен: Радуйся, Живоносный Кресте:

На Брак Агнчий Владыкою Христом призвани, /
во одежду светлу добродетелей одеялися есте / и
угодны явистесья Христу Богу со всеми святыми,
/ наслаждающесе нетленною пищею // во
Царствии Небеснем.

В багрянныя ризы / кровию твоею облачился еси
/ и явился еси истиннейший священник Бога
Вышняго, / во Царствии Небеснем ныне
пребываеши, / священномучениче Александре,
/ молися даровати нам грехов прощение // и
веры утверждение.

Воистину дар Божий / явишася нам мощи твоя,
/ святой священномучениче Феодоре, / болезни
телесныя исцеляюще, / и душевныя страсти

искореняюще, / и в нуждах помогающе, // всем
любовию тя почитающим.

Плодоносное прозябение веры Христовы /
явистесь мученицы, Александре и Феодоре. /
Темже кровию вашею / землю нашу освящающе
/ и Церковь Русскую украшающе, / молитесь
Христа Бога, // да соблюдет нас от всякаго
навета вражия.

Слава, глас 6:

Днесь благодать Святаго Духа нас собра / в
прославление святых священномучеников
Александра и Феодора, / тии бо предстоят
Престолу Всецаря // и молятся о спасении душ
наших.

И ныне: Богородичен “Кто Тебе не ублажит...”

Вход. Прокимен дне.

И чтения новомучеником:

Деян. 4,6-31; 2 Тим. 4,1-8; Евр. 11,33-40.

На литии стихира новомучеником, глас 6:

Подобен: Отчаянная:

Творение святителя Афанасия Ковровскаго.

Отчаяни есмы / жития ради / и не имамы /
нрава добродетельна, / но, яко миро, приносим
Ти, Господи, / молитвы святых сродников
наших. / Не отвержи Русь, издревле Святую, /
ныне же грехов наших ради люте
страждующую. / Не презри слезы верных сынов,
/ колен своих пред Ваалом не преклонявших, /
и ихже не поразил еси, согрешающих. / Приими
нас, кающихся, Боже, / святых Твоих мольбами.

Стихиры на стиховне, глас 2:

Подобне древним мучеником, святии
Александре и Феодоре, / во страданиях
страшных пребысте непоколебими / и
мучителем вашим вопияете: / страха вашего не
убоимся, ниже смутимся, // яко с нами Бог.

Стих: Проидохом сквозе огонь и воду, / и извел
еси ны в покой.

Небрегше о сосудех телес ваших, / в различных
изязаниях / мученически течение жития
скончаше, / темже, память вашу празднующе, /
цветы песенными венчаем вас, / ходатаев
наших пред Христом Богом, // Егоже молите
спасти и просветити души наша.

Стих: Блажени живущии в дому Твоем, / в веки
веков восхвалят Тя.

Егда, яко мученики, имеюще дерзновение / ко Христу Богу нашему, / востаните судити миру / во Второе Пришествие Его: // тогда помяните и нас, память вашу любовью празднующих.

Слава, глас 2:

Яко плод зрелый благочестный / сподобистесь принести Христу тела ваша, / священномученицы Александре и Феодоре, / и собрани бысте в житницу Его, // молитесь спасти и просветити души наша.

И ныне, глас 6:

Егда приидет времен исполнение, / труба же Архангелова вострубит, / престоли судищныя поставятся и река огненная возшумит, / мертвии возстанут и живии восхищени будут, / и явится знамение Сына Человеческаго на Небесех, / вси земнороднии восплачутся, / и вся силы небесныя поколеблются, / тогда Дева Богородица, / грешных Спасение и ненадежных Надежда, / одесную Судии предстоящи, явится, / Пречистей Своей руке к Сыну простирающи, / и слезами ланиты Своя милостивно орошающи, / и вечнаго мучения избавляющи, / имя Ея препетое призывающих. / Темже убо, братие, / ныне потщимся и к Богородице прибегати не обленимся, / да и нас заступит в оный

страшный час, / все упование на Ню
возлагающих.

По Ныне отпускаеши: тропарь
священномучеником дважды и Богородице
Дево: единожды.

Тропарь, глас 1:

Бескровную Жертву Богу приносяще, /
предстояли есте престолу земнаго храма. /
Изливше же кровь свою за Христа, / днесь
предстоите Небесному Престолу Царя Славы, /
святии священномученицы Александре и
Феодоре, // молитесь непрестанно спастися
душам нашим.

НА УТРЕНИ

По 1 - ом стихословии седален:

Вы, святии Александре и Феодоре, яко
священницы Бога Вседержителя, приясте власть
прощати и решити грехи, разрешите зол моих
множество и направите жизнь мою на путь
заповедей Божиих.

Слава, и ныне:

Яко юродивыя девы не имам светильника покаяния, не обретох бо елея милости, слез и въздыханий сердечных, тщетно толку в двери, затворенныя ми грехом: Мати Божия, отверзи ми двери милости Твоея.

По 2 - ом стихословии седален:

Законно пострадасте, венцами нетленными от Господа венчались есте, и нас утвердите подвигом добрым подвизатися, течение жизни достойно совершити, вас бо теплыя ходатаив ко Спасу стяжахом.

Слава, и ныне:

Буди нам Заступница и Покров от враг видимых и невидимых, Пресвятая Богородице, и Предстательница пред Богом, молящи Его вкупе со священномучениками Александром и Феодором о спасении нашем.

На полиелее величание:

Величаем вас, / святии священномученицы Александре и Феодоре, / и чтим честная страдания ваша, / яже за Христа // претерпели есте.

Псалом избранный: Бог нам прибежище и сила:

Седален по полиелеи:

Днесь двоицу святых страдальцев прославим, крепкаго духом Александра и мужественнаго Феодора, сии бо службу святым братьям Косме и Дамиану совершивше, спострадати им сподобишася, яко братия духовнии суще, ныне же молятся Христу Богу в вере, надежди и любви сохранитися нам.

Слава, и ныне:

Богородице, Упование наше, буди нам Помощница и Предстательница пред Сыном Твоим, Христом Богом нашим, во вся дни живота нашего.

Прокимен, глас 4: Проидохом сквозе огонь и воду, / и извел еси ны в покой.

Стих: Разжегл ны еси, якоже разжизается сребро.

Евангелие от Матфея, зачало 36 (10, 16-22):

Рече Господь Своим учеником, се Аз посылаю вас: конец: Претерпевый же до конца, той спасен будет.

Стихира по 50-м псалме, глас 6:

Како возможем прославити вас по достоянию / или что принесем вам в дар, / святии священномученицы Александре и Феодоре, / от Самого Христа Бога прославления? / Но примите усердныя мольбы наша, // вас бо теплыя предстатели ко Спасу стяжахом.

КАНОН

Песнь 1 Ирмос: Яко по суху :

Како дерзну, недостойный, прославити священную двойцу мучеников, кровь свою Христа ради проливших и пред лицом безбожных Имя Его исповедовавших? Но даждь ми, Господи, слово прославити сих, Тебе в житии своем прославивших.

Во страдании Христа исповедавше, вы явистесь воистину камение на истиннем Камени Христе утверждения.

В любви ко Господу возрастаяще, вы исполнили есте заповедь любви вышшия, темже о нас Христа Бога молитесь, да утвердит в любви души наша.

Слава, и ныне:

Что принесет Тебе, Владычице Богородице, наше неможение? Кую песнь воспоем Тебе, рождшей Бога плотию? Токмо ту, коею Гавриил Архангел нас научи: радуйся, Благодатная, Господь с Тобою.

Песнь 3 Ирмос: Несть свят:

Заповедем Господним поучающесе и от соблазнов мира сего удаляющесе, явистесе избраннии сосуди Духа Святаго, святии Александре и Феодоре, и, от Него укрепляеми, шествовали есте во след распеншагося Христа и от Того венчалися есте венцами небесными.

Юдоль земную благочестно прошедше и кровию своею веру запечатлевше, ныне со всеми святыми прославляетея в Царствии Небеснем, помяните и нас, священномученицы доблии, память вашу празднующих.

Образ верным покажастея в деле, слове, житии и смерти за Христа. Темже молитесе за нас, чад ваших, яко да достойни явимся вашего за нас предстательства.

Слава, и ныне:

Како возмогла еси вместити Невместимаго?
Како родила еси, из Негоже вся быша? Что

возглаголю Тебе, окаянный аз, или что воспою?
Токмо: радуйся, Благодатная, Господь с Тобою.

Седален:

Украшение пастырей явистеся, святии священномученицы Александре и Феодоре, Бескровную Жертву усердно Богу приносяще и в добродетелех возрастающе, сподобилися естество венцы мученическия от Христа прияти. Темже молитве, да подаст Он пастырем Церкви ревность и попечение о спасении душ наших.

Слава, и ныне:

Витии словеснии умолкают, Дево, в Рождестве Твоем, зряще како раждаеши всю тварь Содержащаго дланию? Мы же в благоговении и трепете предстоим Тебе, взывающе: радуйся, Благодатная, Господь с Тобою.

Песнь 4 Ирмос: Христос моя сила:

От рук безбожных заклатися изволили есте, пастырие Божии, Агнцу и Пастырю Христу последовавше и Того за коление вообразивше.

Пастыреначальнику Христу подражающе, пастырие Божии суще, страсотерпцы, молистеся за убийц своих: Боже, прости им, не ведают бо, что творят.

Духа Святаго вместилище, , явившеся, святыя
мощи ваша нам оставили есте, достохвальнии,
ихже мы обретше дивно, с преподобным аввою
Сергием вас ныне ублажаем.

Слава, и ныне:

О, Владычице Богородице, буди нам Щит и
Заступление во дни испытаний, находящих на
ны: разве бо Тебе инаго предстательства не
вемы.

Песнь 5 Ирмос: Божиим светом :

Яко свеща, возженная пред Богом, житие твое
бысть, святой мучениче Александре,
просвещающая тьму неверия и безбожия, землю
Русскую объявшую. Ты бо был еси воистину отец
духовный верным чадом твоим.

Воли Божией себе вручивше, святии
священномученицы, не обязастеся куплями
житейскими, оставивше же вся яже в мире сем
и за Христом на смерть последовавше,
получисте от Него обетованное Царство.

Новомученицы Российстии, простотою,
милосердием, незлобием и любовью
подражателие бысте древним мучеником Косме
и Дамиану. Темже и празднество им

совершивше, пострадати сподобистеся и с ними достойно ныне веселитеся в Царствии Небеснем.

Слава, и ныне:

Аще не была бы Ты, Владычице, Предстательница наша пред Господем, како могли быхом приступити к Нему, обремененнии многими грехми? Но в Тебе имуще дерзновение, вопием Христу о спасении нашем.

Песнь 6 Ирмос: Житейское море:

Мужески страдания претерпесте, человеческое естество превозмогающе, пастырие Христови, и яко хлеб сладкий Святей Троице принесостеся. Молите Христа Бога, да помилует всех нас.

Жертву Безкровную усердно Богу приносяще, священномученицы, вменистесе, яко овцы заколения, и пожрени бысте за Христа, Егоже всем сердцем возлюбили есте.

В смерти вашей явистесе семенем веры, святии Александре и Феодоре, кровию же вашею Церковь утверждающе, бысте достойнии делателие винограда Христова. Темже от Бога получите венцы нетленные.

Слава, и ныне:

В скорбех Помощницу, в болезнях Целительницу, от уз Свободительницу обретохом Тя, Владычице Богородице, темже молим Тя: не удали от нас милости Твоея.

Кондак, глас 2:

Пастырие Христовы, Александре и Феодоре, священномученик чудная двоице, мужественне веру православную пред мучители исповедовавшии и кровию своею землю Русскую обогрившии, страдания ваша днесь благочестно восхваляем и мощи ваша умильно лобызаем, молитве непрестанно о всех нас.

Кондак: священномученику Александру, глас 3:

Душу свою милосердием удобрил еси, / предался еси в руке Божии, / безбожных мучителей удивил еси, / предвозвестив им смерть грядущую, яко бывшую; / и душею твоею, яко нетленною звездою, / сонм святых украсил еси; / сего ради и мы восхваляем тя, / святой священномучениче Александре /, пастырей добрых крепосте и утверждение.

Икос:

Руками вашими Безкровную Жертву Богу принесосте и от рук Его венцы мученические и нетление приясте. Мы же, чудеса ваша зряще,

верно вопием: Радуйтесь, исповедницы Христа Бога нашего; радуйтесь, яко за Него пострадати изволисте. Радуйтесь, Царства Небеснаго наследницы; радуйтесь, яко дар мощи своя нам остависте. Радуйтесь, земли Московския столпи непоколебимии; радуйтесь, граду нашему освящение и утверждение. Радуйтесь, прибегающим к вам скории помощницы; радуйтесь, яко исцеляете душевныя недуги. Радуйтесь, Александре и Феодоре, пастырей добрых крепосте и утверждение.

Песнь 7 Ирмос: Россодательну убо пещь :

Господь, древле росу с Небесе трием отроком пославый, и вам терпение и крепость во страданиих подаде, вы же, страстотерпцы, любовь к Нему распалающесе, пети научисте всех: благословен еси, Боже отец наших.

Яко отроцы посреде огня неопально стояху, тако и вы, святии мученицы Александре и Феодоре, посреде огненнаго испытания веры неопалими бысте и Христу вопияли есте: благословен еси, Боже отец наших.

Яко злато в горниле очищено явистесе, святии мученицы Александре и Феодоре, во страдании крепчайше адаманта бывше, Христу вопияли есте: благословен еси, Боже отец наших.

Слава, и ныне:

На Тя, Богородице, упование возлагаем, вернии людие, да не постыдимся никогдаже, но имуще Тя Покров и Стену Нерушимую, вопием Ти: радуйся, Благодатная, Господь с Тобою.

Песнь 8 Ирмос: Из пламене :

Облика пастырскаго не отреклся еси, священномучениче Александре, пред лицом безбожных исповедовав Истину, и даже до смерти верным пребыл еси Пастыреначальнику Христу, от Негоже венец победный приял еси во Царствии Небеснем.

Во страдании своем мучителей удивив, блаженне Феодоре, Христа не отверглся еси и, силою Его укрепляемь, всех научал еси вопити: благословен еси Боже отец наших.

Ревнителие убо отеческих преданий и блюстителие уставов церковных пребысте, святии священномученицы Александре и Феодоре, наставляюще верных твердо шествовати путем заповедей Христовых. Молите Христа Бога, да соблюдет Церковь Свою от наветов вражиих.

Слава, и ныне: троичен:

В Трех Лицах Бога исповедую, Отца, и Сына, и Духа Святаго, Троицу Единосущную и Нераздельную.

Песнь 9 Ирмос: Бога человеком :

Словеса Давидова приемлюще: “Се что добро или что красно, но еже жити братии вкупе”, вы, святии, яко братия единокровнии явистесь и, пребывше единомыслени во страданиях, в Царствии Христовом ныне веселитесь.

Смертию вашею веру в воскресение исповедаете, священномученицы предивнии, и бесстрашно страданиями ко Господу приидосте, верующе, яко кто погубит душу свою Христа ради, восприимет ю во Царствии Небеснем.

Терпением многим муки претерпевше, святии мученицы Александре и Феодоре, Христа смертию вашею прославили. О нас Того прилежно молитесь, да спасет души наша.

Слава, и ныне:

Богородице Дево, моли Сына Твоего и Бога нашего со всеми святыми в земли Российской просиявшими, да избавит Отечество наше от

неверия и сохранит нерушиму Церковь
Православную.

Светилен:

Мучения за Христа яко истинный дар Божий
восприясте, мученицы славнии, и кровию
вашею потописте бесовския полки, ныне же
сцарствуете Ему во веки.

Слава, и ныне:

Под Твою милость прибегаем, Богородице Дево,
молитв наших не презри в скорбех, но от бед
избави нас Едина Чистая и Благословенная.

На хвалитех, глас 8: Подобен: Что вас наречем:

Что вас наречем, святии мученицы, / Ангели,
яко презресте своя телеса; / Херувими, яко на
вас почи благодать Божия; // Силы, яко творите
чудеса молитвами вашими?

Что вас наречем, святии мученицы, / солнце,
яко изливаете Свет Христов по всей земли, /
столпи, яко укреписте небосвод церковный //
страданиями вашими за Христа?

Придите, мучениколюбцев собори, / восхвалим
заступников наших святых Александра и

Феодора, / тии бо предстоят Престолу Всецаря // и молятся о душах наших.

Слава, глас 6: подобен: Все отложше:

Восхваляюще заступников наших, / святых мучеников Александра и Феодора, / воспоим Христу победную песнь: / слава Тебе, мучеников крепосте, / слава Тебе, явившему дивных святых в последняя времена; // тех предстательством помилуй нас.

И ныне, Богородичен, глас 6:

Богородице, Ты еси лоза истинная, / возрадившая нам Плод Живота, / Тебе молимся, молися, Владычице, / со святыми священномучениками Александром и Феодором, // помиловатися душам нашим.

На Литургии

Прокимен, глас 7: Честна пред Господем смерть преподобных Его.

Стих: Что воздам Господеви о всех, яже воздаде ми;

Апостол к Римляном, зач. 99(8,28-39): Братие, вемы, яко любящим Бога вся спешествуют во

благое;

Аллилуиа, глас 2: Священницы Твои оденуты в правду, и преподобнии Твои возрадуются.

Стих: Бог нам прибежище и сила, Помощник в скорбех, обретших ны зело.

Евангелие от Луки, зач. 106 (21, 12-19):

Возложат на вы руки своя:

Причастен: Радуйтесь, праведнии о Господе, правым подобает похвала.

